



Broj: 04-04-4-3429/21  
Sarajevo, 27. 12. 2021. godine

**SAOPĆENJE ZA JAVNOST O OBJAVLJENOM IZVJEŠTAJU REVIZIJE UČINKA  
„PRAĆENJE REALIZACIJE PREPORUKA IZ IZVJEŠTAJA REVIZIJE UČINKA 'UPRAVLJANJE PROGRAMIMA  
SUFINANSIRANJA ZAPOŠLJAVANJA'“**

Ured za reviziju institucija u Federaciji Bosne i Hercegovine proveo je praćenje realizacije preporuka iz Izvještaja revizije učinka „Upravljanje programima sufinansiranja zapošljavanja“, objavljenog 2019. godine. Cilj je bio ispitati preduzete aktivnosti i procijeniti u kojoj mjeri su date preporuke realizovane.

Analizirane su aktivnosti Parlamenta FBiH, Vlade FBiH, Federalnog zavoda za zapošljavanje i službi za zapošljavanje na realizaciji jedanaest datih preporuka. Ustanovljeno je da date preporuke nisu u potpunosti realizovane, odnosno propusti koji su identifikovani još uvijek nisu otklonjeni.

Praćenje realizacije preporuka je pokazalo da temeljne pretpostavke za unapređenje predmetne oblasti i dalje nisu uspostavljene, s obzirom na to da se kasni s donošenjem **Strategije zapošljavanja u Federaciji Bosne i Hercegovine** i izmjenama i dopunama **Zakona o posredovanju u zapošljavanju**. Pored toga, **već dugi niz godina čeka se da Federalni zavod za zapošljavanje i službe za zapošljavanje uspostave kvalitetne evidencije o nezaposlenim osobama** koje su neophodan preduslov za upravljanje programima zapošljavanja i učinkovitije posredovanje u zapošljavanju.

U periodu 2019-2021. godine, od planiranih **cca 125,7 miliona** za programe sufinansiranja zapošljavanja **Federalnog zavoda za zapošljavanje** utrošeno je **cca 57,2 miliona KM**, odnosno **46% planiranih sredstava** što ukazuje na nisku realizaciju planiranih sredstava, te nedovoljnu efikasnost u realizaciji programa.

**Federalni zavod za zapošljavanje, uprkos datoj preporuci, nije utvrdio period u kojem je potrebno realizovati programe sufinansiranja zapošljavanja**, te je nastavio s praksom započinjanja novih programa, iako oni iz prethodnih godina nisu okončani. Ovakvim načinom planiranja i implementacije, istovremeno se realizuju programi iz više godina, od kojih svaki sadrži veliki broj različitih mjera zapošljavanja zbog čega je **otežana kontrola realizacije programa i mjerenje ostvarenih efekata**.

Određeni pomak je napravljan u dijelu planiranja programa sufinansiranja zapošljavanja, s obzirom na to da su u posmatranim godinama planirane nove mjere zapošljavanja usmjerene na konkretne ciljne grupe teže zapošljivih nezaposlenih osobe. Međutim, podaci o realizaciji programa pokazali su da je u periodu 2019-2021. godine, **70% sredstava utrošeno** na mjere zapošljavanja koje nisu bile usmjerene na teže zapošljive nezaposlene osobe.

**U programima sufinansiranja zapošljavanja nije propisana obaveza poslodavcima** da nakon isteka ugovora o sufinansiranju, izvjesno vrijeme zadrže sufinansiranu osobu u radnom odnosu, **kako bi se osiguralo dugoročnije zapošljavanje osoba s biroa**. Pored toga, Federalni zavod za zapošljavanje nije osigurao da se pri realizaciji programa daje prednost poslodavcima koji su spremni na duži period zaposliti nezaposlene osobe.

Uzimajući u obzir stanje u oblasti zapošljavanja u FBiH, Ured za reviziju cijeni da je **potrebno ozbiljnije pristupiti upravljanju programima sufinansiranja zapošljavanja**, kao mjeri aktivne politike zapošljavanja u koju Federalni zavod za zapošljavanje već godinama ulaže značajna finansijska sredstva.

Kompletan Izvještaj revizije učinka dostupan je na internet-stranici Ureda za reviziju: [www.vrifbih.ba](http://www.vrifbih.ba).



**GENERALNI REVIZOR**  
Dževad Nekić